

# TEZAUUR LITURGIC

25 IANUARIE

# ACATISTUL SF. IERARH-MUCENIC VLADIMIR BOGOIAVLENSKI, MITROPOLITUL KIEVULUI



MOSCOVA, 2000



## **Акафист**

# **Священномученику Владимиру, митрополиту Киевскому и Галицкому**

### **Кондак 1**

---

Избранный пастырю Христова стада и сосуде  
достойный Божия благодати, веры  
Православной поборниче, от безбожников даже  
до смерти пострадавый, песнями велегласно  
восхваляем тя, светозарный отче наш  
Владимире, ты же, дерзновение ко Господу  
имый, на стезю спасения настави нас,  
благочестною любовью поющих ти: Радуйся,  
Владимире, негасимый Православия  
свещильниче!

### **Икос 1**

---

Ангельскою любовью ко Господу горевый и  
измлада нрав твой долготерпелив и кроток  
показавый, миру Православному христианин  
всесовершен явился еси, исповедниче Христов  
Владимире. Ныне же Трисвятую песнь на  
небесех со Ангельскими чинми воспевай,

недостойных нас услыши, на земли со слезами  
умиления взывающих:

Радуйся, благочестивых родителей  
преславное рождение.

Радуйся, благое и богодуховенное тех  
воспитание.

Радуйся, от юности Христу служить  
возжелавый.

Радуйся, нелицемерную по Бозе ревность  
показавый.

Радуйся, благоутробия Христова  
подражателю.

Радуйся, Евангельского слова  
благовествователю.

Радуйся, блистание Божественного света.

Радуйся, сияние небесная благодати.

Радуйся, души верных просвещаяй.

Радуйся, сердца ищущих правды Божией  
озаряяй.

Радуйся, человеке небесный.

Радуйся, ангеле земный.

Радуйся, Владимире, негасимый Православия  
свещильниче!

## Кондак 2

---

Видя и разумеая во всяцей скорби и  
напасти ко спасению душ наших наставление,  
не уны и не отчаяся, святой Владимире, егда  
лишился еси сына отрока и любезныя твоя  
супруги. Но терпеливно скорбь сию подъял еси и  
утешение в монашестве обрел еси, стопы своя ко  
служению единому Христу направляяй. Сподоби  
же и нас во всех бедах Благоподателя святую  
волю разумети, не противлятися спасительному  
промыслу Его, но присно славити за вся Творца  
и Бога: Аллилуия!

## Икос 2

---

Разум Всевышний приосени тя, пастырю  
всехвальный наш Владимире, егда избра тебе  
Господь во епископа Святыя Церкви  
Православныя, во еже день и ночь пещися ти о  
агнцех Божиих, да ни един убо от них погибнет.  
Ты же, яко послушник трудолюбный,  
пастырское делание смиренномудренно творил  
еси. Тако и ныне, во обителях небесных  
пребываяй, наставник неусыпный буди нам, на

тя надеющимся и глаголющим из глубины  
сердечныя:

Радуйся, вся красная и сладкая мира сего  
презревый.

Радуйся, от тленных на нетленная очи  
духовныя обративый.

Радуйся, епископство яко великий дар  
Господень восприявый.

Радуйся, обильно в хиротонии благословение  
небесное стяжавый.

Радуйся, надежный ко спасению  
путеводителю.

Радуйся, заблуждших неустанный  
вразумителю.

Радуйся, мудрых века сего мудрейший.

Радуйся, рабе Христов добрейший.

Радуйся, иерарше славный, со святыми  
почиваяй.

Радуйся, молитв твоих покровом паству  
присно соблюдаяй.

Радуйся, неусыпаемый в бедах помощниче.

Радуйся, благий о нас печальниче.

Радуйся, Владимире, негасимый Православия  
свещильниче!

### **Кондак 3**

---

Силою Всевышняго незримо укрепляемь,  
истинное мужество явил еси, преблаженне  
архипастырю Владимире, егда спасаше от глада  
и мора чада твоя страдающая. Зрел еси окрест,  
яко мнози мором гибляху, обаче не смутился еси,  
но Крестом Животворящим и Честным  
вооружився, прехождаше посреде людей  
поволжских, помощь подая, печали утоляя.  
Такожде и нам, духовным гладом истощаемым  
и недугом маловерия одержимым, помози  
предстательством твоим ко Господу,  
прославляемому присно: Аллилуия!

### **Икос 3**

---

Имеяй выну попечение о чадех Божиих, сих  
отечески к богоугодней жизни направляя еси,  
постом, молитвою и праведными делы  
предивный подвиг в подражание святым  
Христовым показавый. Сего ради твоя  
пастырския добродетели хваляще, тя,  
Боголюбче, ублажаем сице:

Радуйся, благоутробия великаго сокровище.

Радуйся, Божественнаго промысления о нас  
приятелище.

Радуйся, Святыя Церкви Православныя  
украшение.

Радуйся, о чадах твоих теплое моление.

Радуйся, о мире паствы твоея попечителю.

Радуйся, от всяких бед усердный наш  
хранителю.

Радуйся, покрове, на пути спасения нас  
осеняяй.

Радуйся, столпе огневидный, во тьме  
неведения нас просвещаяй.

Радуйся, яко корения смущений трудолюбно  
исторгал еси.

Радуйся, яко терние неверия глаголом  
попалял еси.

Радуйся, архиерею Божий,  
Пастыреначальником Христом прославленный.

Радуйся, иерарше Христов, даров Духа  
Святаго преисполненный.

Радуйся, Владимире, негасимый Православия  
свительниче!

## Кондак 4

---

Бурю велию прещении вражиих отврати от нас молитвами твоими, всеусердный Господа служителю Владимире, и буди нам ограждение неборимое, яко в животе твоём защититель безмездный был еси всем, Царю Небесному поющим: Аллилуия!

## Икос 4

---

Слыша и видя множество напастей мира сего, сам болезни и тяготы терпя, николиже ближния и други забывал еси, милосердне отче наш Владимире, но отеческими попечении всем помогая, ни едино же прошение нуждающихся презрел еси. Научи и нас друг друга тяготы носити, воспевающия и прославляющия тя сице:

Радуйся, любовью Божественною горяй.

Радуйся, за други своя душу не щадяй.

Радуйся, яко многи скорби и труды подъял еси.

Радуйся, яко вся ради Возлюбльшаго тя претерпел еси.

Радуйся, вдовиц и сирых щедрейший питателю.

Радуйся, гонимых и обидимых предстателю.

Радуйся, скорбящим сострадателю.

Радуйся, просящим милости подателю.

Радуйся, чаше, елей милости Божия к нам содержащая.

Радуйся, горо, тучи гнева Господня от нас отводящая.

Радуйся, яко и по преставлении твоём с нами пребываеши.

Радуйся, яко в селениях небесных почивая, нас не оставляеши.

Радуйся, Владимире, негасимый Православия светильниче!

### **Кондак 5**

---

Боготечная звезда явился еси миру и светильник теплый людем православным, всероссийский архипастырю Владимире, пастыреначальником в триех стольных градах русских бывый, наипаче же во обличении расколов порадевый, во еже нераздран хитон Христов нешвенный сохранить. Таковому о тебе произволению Господню радуящеся, воспеваем Ему: Аллилуия!

## Икос 5

Видя тя в селениих небесных, зело радуется святыи равноапостольный Владимир, имже возсия нам свет Христовы Истины, зане и ты Божественною волею в богохранимом граде Киеве прославился еси, страдальчеством за Христа во дни великих испытаний. Тако и мы, блаженне, ликовствуем о тебе:

Радуйся, крестителя Руси достойный соименниче.

Радуйся, того неленостный споспешниче.

Радуйся, в стране Российстей боголучно возсиявый.

Радуйся, паству всероссийскую духовно удобривый.

Радуйся, богоугодно на земли поживый.

Радуйся, любовью Божественною страх смертный победивый.

Радуйся, священномучениче, за Христову веру пострадавый.

Радуйся, страдальче, дух твой в руке Господу предавый.

Радуйся, смерть вкусивый и тления не знаяй.

Радуйся, с Печерскими отцы во святых пещерах почиваяй.

Радуйся, обители преславней украшение.

Радуйся, монашествующих в ней утешение.

Радуйся, Владимире, негасимый Православия светильниче!

### **Кондак 6**

---

Проповедниче усердный слова Божия, Владимире, многомудрыми вещании твоими лжеучения безбожных обличал еси, от прельщений душепагубных Христова чада сохраняя. Темже удостоился еси непрестанных славословий на земли, воспеваяй в Вышних Богу: Аллилуия!

### **Икос 6**

---

Возсиял еси в отечестве своем, исповедниче Христов Владимире, яко новое светило на небесней тверди, сиянием подвигов твоих тьму нечестия разгоняй и мир православный ублажати ты сице подвизаяй:

Радуйся, крепкая вайе древа правоверия.

Радуйся, богоизбранный посрамителю неверия.

Радуйся, Евангельское слово, яко меч духовный, возлюбивый.

Радуйся, от стрел лукаваго щитом веры ся оградивый.

Радуйся, усты многомудрыми Божественныя истины вещай.

Радуйся, пред Богом заступление нам крепкое являй.

Радуйся, свеще, молитвенным огнем за нас горящая.

Радуйся, драгое миро, в храме Божиим благоухающее.

Радуйся, даров небесных неоскудное вместилище.

Радуйся, Божественныя мудрости хранилище.

Радуйся, крепкое падающих возведение.

Радуйся, стоящих право утверждение.

Радуйся, Владимире, негасимый Православия светильниче!

### **Кондак 7**

---

Хотяй прославити тя верою неодолимою, даде узрети ти Владыка наш Господь, како

безбожницы в обители Печерстей, яко во аде бесы, бесновашася, безстудие творяще и древняя святыни оскверняюще. Обаче сих прещений вражиих не убоявся, богоизбранный отче наш Владимире, единому Заступнику от всяких зол усердная моления вознесл еси, зывая неослабне Богу: Аллилуия!

### **Икос 7**

---

Новый образ милосердия явил еси нам, мучениче и святителю Владимире, егда пред кончиною благословил еси мучители твоя. Таковому твоему незлобию дивящися и в тебе неизреченную славу Человеколюбца зряще, славословим тя и восхваляем сице:

Радуйся, милосердия небеснаго зеркало.

Радуйся, Христовы Церкви твердое забрало.

Радуйся, прерадостное наше утешение.

Радуйся, лукавым силам устрашение.

Радуйся, молитися за недруги учивый.

Радуйся, и сам мучители твоя простивый.

Радуйся, яко тобою безумнии глумителие посрамляются.

Радуйся, яко тобою сила Божия является.

Радуйся, всечестно почитаемый на земли.

Радуйся, венцем нетленным украшенный на небеси.

Радуйся, яко с преподобными отцы во веки пребываеши.

Радуйся, яко отечество наше купно с теми защищаеши.

Радуйся, Владимире, негасимый Православия светильниче!

### **Кондак 8**

Страннолепен и великоименит, исповедниче Христов Владимире, яко радетье неусыпный о Господнем доме был еси, молитвы и труды твоя на благоустройство храмов направляя. О чиннем же богослужении и доброгласнем пении ревнуя, награду велию у Господа снискал еси, в небесных вертоградех Ангелы пет быти. Мы же, зряще ныне храмов разоренных восставление и лепоты церковныя поновление, к тебе взываем: помози воздвигнути святыя храмы в душах наших и добродетельми их украсити, с тобою купно воспевающе Благоподателю и Жизнодавцу: Аллилуия!

## Икос 8

Всея земли Российския архипастырю, первый из новомучеников во время лютое гонений на православных христиан пострадавый, зовем тя, благодать стяжавшаго молитися за мир: не премолчи о нас, к священной твоей раце припадающих и во умилении поющих песнь тебе:

Радуйся, крест свой на рамена, Христу последуя, подъявый.

Радуйся, стезю страданий за Него избравый.

Радуйся, мудрейший странниче, иский отечества небеснаго.

Радуйся, угодниче Христов, презревый вся земная.

Радуйся, дому Божию надежный и страже и хранителю.

Радуйся, иереев добрый попечителю.

Радуйся, кающихся с Богом примирителю.

Радуйся, Спасителя возлюбльших покровителю.

Радуйся, достойный Ангелов собеседниче.

Радуйся, апостолом Христовым  
сопрестольниче.

Радуйся, благоприятную ко Господу молитву  
возсылаяй.

Радуйся, теплою молитвою твоею державу  
нашу согреваяй.

Радуйся, Владимире, негасимый Православия  
свительниче!

### **Кондак 9**

---

Вси чини Ангельстии и святителей лик  
удивишася, зряще тя, Владимире, новаго  
мученика, в пострадавшей и поруганней земли  
Российстей просиявшаго. Мы же ныне  
прославляюще подвиг твой, ко Господу и Спасу  
нашему взываем: Аллилуия!

### **Икос 9**

---

Ветия богомудрый Церкви Православныя и  
доблий воин Христов был еси,  
священномучениче препрославленный  
Владимире. Имеяй сердце мягко, аки воск, волю  
же тверду, аки адамант, не клонился еси семо и  
овамо ни пред властью людскою, ниже пред  
обстоянии мирскими, и сего ради поношения

терпел еси. Верность Господу единому хранивший  
выну, услыши ныне песнь победную сию:

Радуйся, воине Христов непобедимый.

Радуйся, в терпении твердейший адаманте  
невредимый.

Радуйся, яко неблагомыслящих наветы  
претерпел еси.

Радуйся, яко от яростных поношения приял  
еси.

Радуйся, сердце смятенных умирителю.

Радуйся, от озлобления на нас враждующих  
хранителю.

Радуйся, духовных совершенств высоты.

Радуйся, смирения христианского глубины.

Радуйся, российских мучеников удобрение.

Радуйся, архиереев православных  
похваление.

Радуйся, яко от неверия избавляеши.

Радуйся, яко от малодушия исцеляеши.

Радуйся, Владимире, негасимый Православия  
свещильниче!

## Кондак 10

---

Спасительнаго о нас промысла сияние явился нам, егда страдальческую смерть приял еси, священнопроповедниче Владимире, ты бо жертва непорочная и явился еси ходатаи за людей православных, отступлением от веры согрешивших. Мы же ныне сокрушенным сердцем со слезами о спасении страны Российской молящися, к Судии Благоутробному взываем: Аллилуия!

## Икос 10

---

Стено и ограждение державы нашея, святителю Владимире, радеть неустанный о уставех православных был еси. Сохрани и ныне нас от пагубныя ереси, огради от раздирания Церквей, упаси от соблазнения лжеученьми, да пребудем в лоне Церкви Истинныя. Твоего же ради заступления неустанно вопием ти сице:

Радуйся, Православия неблазненный ревнителю.

Радуйся, шатания Церквей искоренителю.

Радуйся, Церковных Таинств благочестный совершителю.

Радуйся, в небесный Иерусалим  
путеводителю.

Радуйся, мечу, раскол и ересь посецаяй.

Радуйся, небесный гrome, гордых устрашаяй.

Радуйся, Евангельскаго света чудное  
блистание.

Радуйся, за правду поносимых упование.

Радуйся, Господню волю сотворивый.

Радуйся, Христовы заповеди сохранивый.

Радуйся, яко честную кровь за веру пролиал  
еси.

Радуйся, яко блаженство неотъемлемое  
стяжал еси.

Радуйся, Владимире, негасимый Православия  
светильниче!

### **Кондак 11**

---

Пение похвальное, еже приносим ти,  
богоблагодатный пастырю Владимире, несть  
довольно восхвалити яко подобает тя,  
благочестное вместилище Святаго Духа, но  
всехвальных ради добродетелей твоих вопием  
ти: моли Господа о нас, студными грехми  
окалявших себе, да низпослет чудеса

неизреченная Своея милости на нас, с тобою  
вкупе днесь поющих Ему: Аллилуия!

## **Икос 11**

---

Светодательная свеща явился еси нам,  
исповедниче Христов и пастырю святой  
Владимире, разгоняяй ночь нечестия и  
освещаяй путь во тьме ходящих. Ныне убо  
умоляти не престай Христа Спаса и Владыку  
нашего, да не даст нам уклониться от стези, ко  
спасению нас, грешных, приводящая, но  
сподобит нас во Царствии Своем тя со Ангелы  
святыми воспевати:

Радуйся, несокрушенный щите, защищаяй  
благочестие.

Радуйся, мечу победный, посекаяй злочестие.

Радуйся, блуждающих в духовном мраце  
окормителю.

Радуйся, честнейший преподобия хранителю.

Радуйся, светильниче Господень, Церковь  
озаряяй.

Радуйся, молящихся ти души умиряяй.

Радуйся, яко недугующих исцеляеши.

Радуйся, яко окамененных сердцем  
оживляеши.

Радуйся, печальниче болящим и  
безпомощным.

Радуйся, заступниче убогим и обидимым.

Радуйся, яко помраченных просвещаеши.

Радуйся, яко просвещенных утверждавши.

Радуйся, Владимире, негасимый Православия  
свещильниче!

### **Кондак 12**

---

Благодать дадеся ти от Бога, отче  
приснославимый Владимире, во еже быти  
нерушимым камнем Христовы Церкви. Твоему  
же образу желающе всем сердцем подражати,  
умоляем тя, блаженне, непрестанно: заступи, да  
не прельстят нас чудеса, силою лукаваго  
творимая, ниже лжепророцы соблазнят. Но во  
единомыслии и правоверии вся Христианы  
сохрани, прославляющия Бога Истиннаго:  
Аллилуия!

### **Икос 12**

---

Поем праведное житие твое, восхваляем  
пречестное твое имя, почитаем за Христа

страдания твоя, удивляемся духовней твоей крепости, радуемся славному обретению мощей твоих, новомучениче святой Владимире, и любовь, воспоминающе о подвизех твоих, восписуем ти хваления сия:

Радуйся, победоносною светлостью облеченный.

Радуйся, святительскому лику сопричтенный.

Радуйся, споспешниче усердный ада Разрушителя.

Радуйся, последователю верный распятого Учителя.

Радуйся, за веру и отечество живот свой положивый.

Радуйся, архиерею добрый, Богу Человеколюбцу угодивый.

Радуйся, яко живот твой непорочен сохранивый.

Радуйся, яко до смерти верен Господу пребывый.

Радуйся, венцем победным паче звезд на небеси блистаяй.

Радуйся, тимпане сладкозвучный, славу Божию бряцаяй.

Радуйся, во отечестве небеснем ныне пребываяй.

Радуйся, и о земнем отечестве твоём не забываяй.

Радуйся, Владимире, негасимый Православия светильниче!

### **Кондак 13**

---

О, страдальче многосветлый и святителю Христов Владимире! Приими малое хваление сие, в простоте сердечней возносимое. Вонми гласу недостойному молящихся тебе и твоими скорыми ко Господу прошения умоли Его пробавити благоутробие Свое на ны, да сподобимся в блаженней радости воспевати Ему славу: Аллилуия!

(Этот кондак читается трижды, затем икос 1 и кондак 1)

### **Молитва**

---

О, священномучениче и исповедниче Христов Владимире! Услыши слезныя молитвы чад твоих и воздыхания, сердцем сокрушенным и

смирненным приносима. Се бо беззаконии омрачихомся и того ради бедами, яко тучами, обложихомся. Но ты, святе Владимире, понеси, яко сильный, немощи наша, не отлучайся от нас духом, да не разлучимся в конец от любви Божия. Призри милостивно на предстоящая и молящаяся пред святою иконою твоею и вся прошения их во благое исполни. Веруем бо, яко твоих страданий ради за отечество и люди российския велие дерзновение ко Господу имаши. Егоже умоли, да укрепит ны в Православии и единомыслии, и непоколебимом даже до смерти исповедании веры Христовы, страну нашу да спасет от междоусобных брани, пастырем нашим да подаст духовное трезвение и ревность о спасении пасомых, правителем же суд и правду, обидимым заступление, недугующим душ и телес исцеление. Мы же, грешнии, твоим предстательством укрепляеми, восхвалим Господа Иисуса Христа, Емуже слава подобает, честь и поклонение, со Безначальным Его Отцем и Пресвятым Духом, ныне и присно и во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

†

НОВОЕ  
\* НЕБО